



Morona'e 10

(14-20 TESEMA)

E mafai faapefea ona ou sailia meaalofo faaleagaga?

O meaalofo faaleagaga e tuuina mai e le Atua e ala mai i le Agaga Paia mo lo tatou manuia (tagai i le Morona'e 10:8). Ua faamanuiaina i tatou taitoatasi i meaalofo faaleagaga mai le Atua, ma e tele meaalofo e mafai ona tatou maua.

O nisi meaalofo faaleagaga ua faailoaina mai i tusitusiga paia (tagai i le Morona'e 10:9–16; Mataupu Faavae ma Feagaiga 46:13–25); ae o le tele e le o i ai. E mafai faapefea ona e faailoa ma atiina ae meaalofo faaleagaga ua tuuina atu ia te oe e le Atua? E mafai faapefea ona e atiina ae isi meaalofo? O nai manatu nei e fesoasoani ai ia te oe:



Ole atu

Tatalo ma ole atu i le Atua po o a meaalofo faaleagaga ua Ia faamanuiaina ai oe ae po o le fea foi e tatau ona e galue agai i ai. O le a Ia fesoasoani ia te oe. O lou faamanuiaga faapeteriaka e ono faaalua ai foi au meaalofo faaleagaga. Afai e te lei mauaina lou faamanuiaga faapeteriaka, mafau-fau e talanoa i lou epikopo po o le peresitene o le paranesi e uiga i le mauaina [o lou faamanuiaga faapeteriaka].

Suesue

O meaalofo faaleagaga e manaomia ai le taumafaiga ia maua ai. A o taumafai ai mo se meaalofo patino, ia mafau-fau e aoao atili e uiga i ai mai tusitusiga paia, lou faamanuiaga faapeteriaka, po o lauga o konafesi aoao. E mafai foi ona e fesili i isi e uiga i o latou aafiaga.



Galue

O le aoao e uiga i meaalofo faaleagaga e aoga tele, ae e tatau ona faaaogaina lena malamalama. Pe a e faatinoina le faatuatua ia Iesu Keriso, salamo, ma tausia au feagaiga, ua e agavaa e maua meaalofo faaleagaga. Ma le isi, ia saili ni tulaga e mafai ai ona faaaoga au meaalofo faaleagaga. Ia manatua o nei meaalofo e le gata ina e manuia ai, ae e mafai foi ona faamanuiaina ai isi (tagai i le Mataupu Faavae ma Feagaiga 46:26). E mafai faapefea ona e faaaogaina au meaalofo faaleagaga e fesoasoani atu ai i isi?

